



Komunikadu Imprensa

31 Jullu 2013

Tribunál aplika suspensaun pena tinan 2 ba kazu violénsia doméstika

Iha 29 Jullu 2013 Tribunál Distritál Díli kondena pena prizaun fulan 6 no suspende pena ba tinan 2 iha kazu violénsia doméstika ne'ebé komete husi arguidu SFE hasoru nia kónjuje NB, iha Distritu Ermera.

Ministériu Públiku akuza katak iha 25 Maiu 2011, tuku 10.00 dadeer, arguidu tuku dala rua iha lezada nia hasan sorin karuk, no tebe dala ida iha kotuk laran to'o monu ba rai. Aktu ne'e rezulta lezada nia tilun hetan ran. Kazu ne'e akontese tanba arguidu husu osan ba lazada atu hola sigaru maibé osan la iha.

“JSMP observa katak kazu violénsia doméstika kontinua julga no hetan kondenasauun iha tribunál. Ne'e hatudu sentidu responsabilidade no konsensia autoridade judisiariu relasiona atu kombate krime kontra fetu. Mesmu nune'e, JSMP enkoraja tribunál sira atu asegura katak suspensaun ba pena prizaun tenke lao ho efetivu”, dehan Direktór Ezekutivu JSMP Luis de Oliveira Sampaio.

Durante ne'e JSMP observa katak maioria krime violénsia doméstika kondena deit ho suspensaun ba pena efetivu iha prizaun. JSMP fiar katak tribunál iha nia konsiderasaun rasik ba kualker desizaun hot-hotu, maibe JSMP husu ba tribunál atu asegura katak iha mekanismu efetivu atu kontrola kondenadu durante periodu suspensaun nia laran.

Ministériu Públiku akuza arguidu kontra artigu 145 Kódigu Penál kona-ba ofensa ba integridade físiika simples konjuja ho artigu 35 alinea (b) Lei Kontra Violénsia Doméstika.

Iha julgamentu arguidu konfesa no rekoñese faktus ne'ebé maka konsta iha akuzasaun. Lezada mos deklarara ba tribunál katak husi akontesimentu ne'e sira hela separadu durante fulan ida. Maibe sira konsege rezolve turi mekanismu kultural iha loron 21 Janeiru 2012. Iha prosesu ne'e, arguidu aprezena deskulpa no fo tais ida ba lezada no promete sei la repete iha futuru.

Iha alegasaun finál Ministériu Públiku husu ba tribunál atu aplika pena suspensaun ba arguidu tanba konsidera arguidu no lezada di'ak malu no hela hamutuk hanesan baibain. Defeza husu ba tribunál atu fo pena ne'ebé mak la prejudika ba arguidu nia liberdade.

Kazu ne'e rejista ho Númeru Prosesu: 156/2013/TDD. Julgamentu prezide husi Dra. Jacinta Correia da Costa. Ministériu Públiku reprezenta husi Dr. Nelson de Carvalho no arguidu hetan defeza husi Dr. Juvinal Yanes Freitas no Dr. Leonidio Marques husi Eskritóriu Defensória Públiku. Ofisiál Justisa ne'ebé responsavel iha prosesu mak Sr. Julio Nunes.

Atu hetan informasaun kompletu, favor bele kontakku direktamente ba:

Luis de Oliveira Sampaio

Diretór Ezekutivu JSMP

Diresaun e-mail: luis@jsmp.minihub.org

info@jsmp.minihub.org

Telefone: 3323883 | 77295795

Website: www.jsmp.tl

Face book: www.facebook.com/timorleste.jsmp

Twitter: @JSMPtl